



## The Holy See

---

IOANNES PAULUS EPISCOPUS

SERVUS SERVORUM DEI

AD PERPETUAM REI MEMORIAM CONSTITUTIO APOSTOLICA **CARAGUATATUBENSIS**\* IN BRASILIA NOVA  
CONDITUR DIOECESIS CARAGUATATUBENSIS Ad aptius consulendum spirituali bono atque regimini Christifidelium,  
Venerabilis Frater David Picão, sacrorum Antistes Santosensis, audita profecto Conferentia episcopali Brasiliensi, ab hac  
Apostolica Sede petivit ut, seiuncto territorio a circumscriptione ecclesiastica sua, nova dioecesis conderetur. Nos vero,  
habito faventi voto Venerabilis Fratris Alfii Rapisarda, Archiepiscopi titulo Cannensis et in Brasilia Apostolici Nuntii, de  
consilio Congregationis pro Episcopis ad motae postulationi libenter concedendum esse putavimus. Summa igitur Nostra  
potestate sequentia decernimus. A Santosensi dioecesi separamus integrum territorium, sicut in praesens civili lege  
circumscribitur, municipiorum quae patrio sermone nuncupantur Caraguatatuba, Ilhabela, São Sebastião et Ubatuba;  
atque ex ita distracto territorio novam constituimus dioecesim Caraguatatubensem, quae iisdem limitabitur finibus, quibus  
praedicta municipia, simul sumpta, prout in lege civili exstant, nunc terminantur. Sic conditae Ecclesiae sedem in urbe  
Caraguatatuba ponimus, ibique exstans templum, Divino Spiritui Sancto dicatum, ad gradum et dignitatem cathedralis  
ecclesiae evehimus, mandantes ut in eo, ad normam iuris, Canonorum Capitulum instituat. Praeterea dioecesim  
*Caraguatatubensem* suffraganeam facimus metropolitanae Sedi Sancti Pauli in Brasilia eiusque Episcopum metropolitico  
iuri Archiepiscopi Sancti Pauli in Brasilia pro tempore subicimus. Cetera vero secundum canonicas leges temperentur.  
Quae statuimus, perficienda committimus memorato Apostolico Nuntio, vel, absente eo, illi, qui curat negotia Sanctae  
Sedis in Brasilia, eisdem tribuentes necessarias et opportunas facultates etiam subdelegandi, ad effectum de quo agitur,  
quemlibet virum in ecclesiastica dignitate constitutum, onere imposito ad Congregationem pro Episcopis authenticum  
exemplar actus peractae executionis, cum primum fas erit, remittendi. Hanc denique Constitutionem Nostram nunc et in  
posterum ratam esse volumus, contrariis quibuslibet rebus non obstantibus. *Datum Romae, apud Sanctum Petrum, die  
tertio mensis Martii, anno Domini millesimo nongentesimo nonagesimo nono, Pontificatus Nostri vicesimo primo.*

ANGELUS card. SODANO

LUCAS card. MOREIRA NEVES

*Secretarius Status*

*Congr. pro Episcop. Praef.*

Eugenius Sevi, *Protonot. Apost.*

Marcellus Rossetti, *Protonot.*

---

*Apost.*

\*A.A.S., vol. XCI (1999), n. 6, pp. 399-490 © Copyright 1999 - Libreria Editrice Vaticana

---

